

那文毅公奏議

那文毅公籌畫回疆善後事宜奏議卷七十四目錄

卷七十四

籌畫西陲經費

請簡賢才置各城專閫

各城章京請復用京員舊制

整飭卡衛

那文毅公籌畫回疆善後事宜奏議卷七十四

男
容安恭輯

籌畫西陲經費

道光七年十一月初十日

奏爲籌畫西陲經費參酌川運成法展限移捐事伏查逆回張格爾小醜跳梁我

皇上命將出師

天戈所指克復四城雖首逆尚未伏誅業已無須大兵現已分別凱撤然此時留兵尚有一萬八千而經費所需不得不通盤籌畫辦理善後事宜事事均

須費用不先事熟籌何以爲繼而籌款於部庫及各省撥解程途遠近大率萬里而遙以一鞘二夫計之前已轉運千餘萬金每站應用夫二萬餘千名地方官造報夫價例所准銷者大率不敷此中貼賠勢不能不按照例價派撥閭閻一經派僱民夫卽不免又增侵擾是轉餉之腳價

國家已屬多費再加以地方貼賠民間擾累更不可以不籌溯查納粟於邊之法乾隆年間大小金川兩次用兵皆開川運例乃昉自康熙年間征北邊之捐輸駝隻例當日均令各捐生自赴軍營交駝

交粟與到京上兌遠近不甚懸殊而轉運之勞均從節省現在回疆籌辦善後事宜卽須寬籌經費亦資錄用人才况酌增常例甫截呈限遠省官生未能遂其報効之忱者甚多若再寬以登進之期自必急公嚮往况從前捐駝納粟長途偷竊倒斃勢所必有加以市僧居奇價值騰長捐生因是畏難不前今回疆糧駝早經籌辦只令各捐生資資報納較之駝粟更爲省便想輸將愈形踴躍而論者謂納粟可以行之於兩金川而不可行之於西陲以甘肅監糴釀成巨案何敢復議踵行殊不知

監糧本係良法奉行不善日久遂滋流弊且當日
納粟多寡並不畫一是以易啟侵欺若按捐例上
兌造冊報部一經截卯便已了結查嘉慶年間南
河捐輸土方東河豫東投效皆就近在江蘇河南
藩庫交納事非久行卽無流弊臣愚昧之見可否
仰懇

皇上天恩俯准續展酌增常例呈限半年援照輸粟之
法令各官生親赴甘肅省城交納其有頭卯未捐
足者亦准其到甘補足歸入續展新卯既可省轉
運兵餉之勞又可裕邊防經費之用惟該官生遠

涉輸將若不量加區別無以鼓其急公奮勉之忱
但稽川運成案另立飛班儘先銓選未免過優且
與頭卯人員選補有礙應請量爲變通此次到甘
捐納人員於捐足不論雙單月給發實收後准其
自備資斧前赴關外聽候差委因該官生等旣已
出資効力免其加捐分發銀兩如果才具出衆著
有勞績准奏明鼓勵其次出力之員咨部籤掣分
發各省免其試用其不耐勞苦及不願赴關外差
遣者仍咨部銓選補足分發銀兩准其掣籤分發
如有身家不清流品卑污之輩隨時奏咨甄別不

稍姑息再查廢員捐復例應奏明請

旨定奪此次籌備軍儲指日告成卽行停止若俟各廢員遠赴甘省紛紛具呈請奏不特案牘滋繁且稽延時日恐致向隅查川運例載除曾擬死罪雖經贖免及大計六法並貪官永不敘用之員不桂報捐外其餘分別情罪加等加倍捐復准其自効應請查照辦理以示變通請

飭下部臣核議謹

奏奉

旨該部速議具奏

道光七年十一月初十日

奏_臣仰蒙

恩命膺茲重任自以籌畫經費爲首先要務前日面奏
監糧尚可復行但緩不濟急若特議開捐則新例
甫停尚未掣籤開選而又別開一例因新壓舊前
班之壅滯堪虞新進之輸將必懈亦有籌及展限
者然在部上兌歸入二卯則銓選分發均已落後
亦難望衆心踴躍從前輸粟於邊之法因運米交
倉頗滋流弊反覆思維實無長策不得已擬存展
限之名參以輸邊之策該捐生挾資而往冀得軍

功則趨事者衆仍按捐例上兌有所稽考亦復無
弊可乘且風聞酌增常例山陝士民實重資而未
報捐者頗多總恐補缺無期致存觀望茲准其赴
營當差寸長皆足自見山陝爲殷實之鄉距甘肅
匪遠此等有心登進之人必能及時自効如果人
人思奮竟可與現收捐項不甚懸殊亦未可定至
於捐生遠赴軍營差遣捐項之外尚需資斧報捐
微末之員斷無餘力此次赴甘差遣各捐生非富
家大族卽巨賈殷商身家必然清白而流品自不
致於混淆臣愚昧之見似謂可行商之戶部滿漢

諸臣亦稱並無窒礙用敢冒昧陳

奏而有章奏之所不敢及者不得不覩縷奏

聞再該捐生出資當差原與投効無異屢蒙

聖諭不准投効蓋軍營與河工不同河工恐投効之員
辦工侵肥以濟捐項軍營則專任驅使並不經手
帑金無事防其侵冒也謹

奏

容安謹按展捐一奏旋經部議准奉

旨允行

道光八年二月初六日會同署陝甘總督鄂公山

奏爲接准移捐部咨議請量爲變通並停止投効再

展例限以期踴躍事竊臣鄂山准戶部咨會同吏

兵二部議覆臣那彥成奏酌增常例展限移捐一

摺於道光七年十二月初六日奉

旨依議欽此咨行到甘轉咨到臣那彥成將部議各條

逐加斟酌悉屬周詳妥協明晰易知各官生廢員

均能恪守遵照不致稍有趨避朦混轉滋流弊惟

甘省地處極邊各捐生資資遠涉較之赴部具呈

尤爲急公報効今部議選補班次先用部捐二人

次用赴甘報捐一人同一酌增常例部捐者三缺

得二移捐者三缺得一未免過於區別應請量爲
變通將頭卯二卯相間輪用或先用頭卯二人次
用二卯二人四缺之後再用各項舊班一人或初
次先用頭卯次用二卯三用頭卯不積二次先頭
卯次二卯三用二卯不積照部議現定三新一舊
章程稍爲參互藉昭平允俾移捐各官生知所感
奮倍形踴躍又捐復人員由部具呈奏准後赴甘
上兌查川運成案除六法永不敘用及罪犯贓私
死罪納贖不准捐復外其餘情罪較輕分別加等
加倍概准捐復今部議以甘省並無該廢員原案

可稽恐有捏飾朦混但例限半年爲期甚促各廢
員由本省赴京具呈議准後赴甘上兌道途遙遠
恐稍有耽延已在截卯之後於事既無實際亦不
足以示體卹臣等愚昧之見凡廢員原籍及寄居
在近京地方者均令赴部具呈其離京較遠省分
准其赴本省督撫衙門具呈卽遊幕往來亦准赴
所在督撫呈請奏咨經部議准後飛行原咨省分
飭知該員赴甘上兌是准駁之權仍留於部而該
廢員稍省往來跋涉之勞亦足鼓其奮志又原奏
令各官生自備資斧出關効力著有勞績及其次

出力之員均免其加捐分發銀兩茲首逆就獲善後事宜不難次第就理無須借資羣力似應停止出關効力照酌增常例頭卯凡報捐各官生及年未及歲並京外現任候補人員改捐加捐廢員捐復均准其專人賫資赴甘上庫者卽令加捐分發銀兩咨部核辦既不出關効力分發後亦毋庸免其試用一切報捐條例均可與頭卯畫一辦理又原奏移捐僅請展限半年茲以雲貴遠省捐生赴甘上兌程途計之卽須半年之久此時各直省甫經奉文移捐投効旋聞紅旗報捷各官生難免遲

疑觀望必待此次奏蒙

恩旨之後通飭曉諭始獲遵循是遠省半年之限業已
虛耗一二月之久爲期更迫如再設措捐資耽延
時日勢必阻其急公報効之忱可否仰懇

聖恩俯准再展半年統限一年於來年二月底截卯庶
遠近捐生均得及時進取而經費亦資裨益再現
在逆首就獲邊境廓清而善後各事費用仍不能
少前奏移捐實爲節省運腳起見若捐項復歸部
庫撥用仍資民力自前年軍興以來兵行州縣均
不免於力役之徵在陝甘爲尤甚雖蒙

皇上軫念民依加恩蠲免而一時元氣未復不得不加
之愛養况此時添設防兵八千名所需移眷屯田
及善後各事宜經費併計不支自應以甘省所收
捐資儘籌邊之用似可毋庸改易臣等往返札商
意見相同謹合詞恭摺具

奏如蒙

俞允請

旨飭下部臣刑入例冊卽速通行各直省出示曉諭遵

照謹

奏奉

硃批軍機大臣會同戶部速議具奏

道光八年二月二十六日

奏爲遵

旨酌度情形據實覆奏事竊臣於二月二十一日臨池

途次承准軍機大臣字寄道光八年二月初一日

奉

上諭據給事中程德潤奏稱上年暫開酌增常例各官
生情殷報効業經上兌者約計千萬未上兌者尚復
不少於軍需實有裨益嗣據那彥成奏請展限移捐
經部議准定有二卯條例彼時首逆在逃辦理善後

事宜均須籌款接濟不得不量爲變通今元惡生擒回疆底定不日全軍凱旋無所用其投効所有續議捐例自宜停止但以目前大局而論西路尚有善後事宜南河又有緊要工程各省庫貯銀兩亦恐不敷籌撥現議二卯捐例尚屬可行惟令其遠赴甘省上兌旣不能希冀議敘又不免往返跋涉勢必觀望不前請將續議甘肅二卯捐例仍歸戶部辦理等語那彥成前此奏請展限移捐原爲善後籌備經費起見現在首逆就擒軍務即可戡功固無所用其投効惟善後一切事宜仍須詳籌妥議將來尚須留兵若干

經費約須若干該督到彼自應通盤籌畫所奏展限
移捐一事是否仍應照原議辦理著卽酌度情形先
行據實覆奏欽此伏查現在生擒張格爾紅旗報捷
軍務告戢自當停止投効惟原議移捐甘省係爲
節省運腳起見此時善後費用不少應准各官生
廢員專人賚資赴甘上兌以息民力當卽函致署
陝甘督臣鄂山往返商榷意見相同業經會銜繕
摺奏

聞在案茲蒙

聖明洞鑒令

臣酌度情形據實具奏竊思添設滿漢兵

丁八千名及舊設各城四千一百名如照換防核計連加增鹽菜並酌加各大臣養廉歲需銀二十萬餘兩若移駐眷兵例准開銷之項尤多勢有不及統計一歲所需俸餉以百分裁二銀款及裁撤卡倫侍衛節省換防盤費通盤約計似亦足敷支用途次未能確核細數俟面晤長齡商定後倘有不敷再行具

奏其捐資多少此時亦難懸擬如於辦理善後之外大有盈餘既可省數年協撥甘餉並可於甘肅藩庫永遠封貯銀數百萬兩以備邊儲

臣愚以爲各

省藩庫均當儲備緩急之資方爲正辦而甘肅爲
新疆門戶尤宜府藏充裕從前捐納西監卽爲新
疆邊費而設嗣因辦理不善永遠停止而歲需兵
餉仍須取給於撥運費而不覺其費此次捐生輸
將踴躍倘竟可厚積數百萬兩久貯甘肅藩庫則
籌邊正所以足

國實爲經久良策相應據實覆奏惟有仰懇

皇上天恩俯准照臣與鄂山會奏前摺仍令各官生廢
員專人賫貲赴甘上兌於善後儲邊均有裨益謹
奏奉

硃批軍機大臣會同戶部速議具奏

容安謹按移捐展限並變通選法由軍機大臣
會同戶部等衙門議准照辦奉

旨依議欽此廢員捐復一節旋經御史條奏停止

請簡賢才置各城專聞

道光七年十二月初八日

奏爲具陳回疆積弊請加考核以資維制事竊查回疆自戡定以來幾及七十載回民極其恭順此番張逆進卡煽惑各城響應固係回性罔識恩義亦半由於平日撫馭失宜早寒回衆之心查乾隆年間各城叅贊辦事領隊大臣

簡放之人或出於保舉賞加副都統職銜或用獲咎之督撫兩司究皆眼界較寬且於公事知所輕重迨後保舉未必盡屬賢能又叅用侍衛與口外駐防

滿洲當時並無一定年限後又定爲三年換班之例在上等才具廉潔有爲心期整頓三年之中卽未必辦理盡善其次中才視爲過差祇存五日京兆之見遇事不肯認真下此竟有視爲利藪藉圖飽其私橐而其中駐防與侍衛爲尤甚侍衛中半皆爲貧起見若伊犁等處駐防皆生長本處地方瓊屑情形較爲熟悉而又在邊荒眼界不大是以一經牟利搜括愈工此種情狀久在

聖明洞鑒之中方今

簡用得人各城中並無不自檢束之人但從前既有積

習不能不防其末流

臣

竊以爲各大臣駐紮一城

各長其疆並無維制考核之分是以彼此不相顧
忌不若外省州縣屬於知府復設司道從而考察
之又設督撫從而統轄之層層相制其中豈無一
二貪婪之吏然維制管束之人既多雖有貪鄙亦
不敢肆志况公道在人亦無不犯之理所以事能
經久不至妄爲今各城大臣亦請分隸考核俾有
所糾察以防其蕩檢踰閑查定例哈密屬於伊犁
將軍吐魯番巴里坤古城庫爾喀拉烏蘇屬於烏
魯木齊都統葉爾羌烏什阿克蘇庫車喀喇沙爾

和闐英吉沙爾並屬於喀什噶爾叅贊大臣而均
統轄於伊犁將軍平日體制如此奈雖有統制之
名而無考核之實彼此又皆熟識遇事遷就各求
自了不肯持正爲公今應增添考核一條如哈密
欽差亦改爲辦事大臣與吐魯番巴里坤古城庫爾喀
拉烏蘇應請並隸於烏魯木齊都統專轄喀喇沙
爾等七城照舊隸於喀什噶爾作爲專轄統屬於
伊犁將軍每屆年終令將軍都統叅贊大臣將各
城大臣出具切實密考各據所見所聞奏
聞首先聲明是石操守廉潔撫馭得宜並及才具辦事

如人地未宜才不勝任隨時奏明更換倘有徇隱
失察之將軍都統叅贊大臣分別交部議處其將
軍都統叅贊大臣不能正己秉公亦准各城大臣
據實叅奏以期互相維繫至於司員本係京缺近
來外保較多以籍隸本處之員而又當差年久利
弊周知任意剝削爲害尤甚嗣後應請責成各城
大臣實心考察如果實在守潔才優方准奏保倘
日後犯有私罪查明原保大臣一併核辦如此明
定章程庶大法小廉回民藉可休養惟各大臣及
司員筆帖式等原設養廉均不敷辦公自應仰懇

皇上天恩勅下部臣少爲議增並准各大臣一律攜眷

有不願者亦從其便期於久任事可盡心廉俸稍
增自好者亦可不存內顧則專心辦公回疆各城
可期日就整頓臣於

陸辭時仰蒙

聖諭首重收撫回衆人心是撫綏得人此爲最要謹
奏奉

硃批所奏是另有旨

道光七年十二月二十日奉

上諭那彥成奏回疆積弊請加考核一摺所奏是著大

學士軍機大臣會議具奏

道光八年正月二十五日奉

上諭大學士軍機大臣會議那彥成奏回疆積弊請加
考核一摺新疆西南兩路分設大臣駐劄皆受伊犁
將軍節制自應分隸考察以期撫馭得宜著照托津
等所議嗣後哈密辦事大臣與吐魯番巴里坤古城
庫爾喀喇烏蘇歸烏魯木齊都統專轄喀喇沙爾庫
車阿克蘇烏什葉爾羌和闐英吉沙爾等七城歸喀
什噶爾參贊專轄均屬伊犁將軍統轄每屆年終該
將軍都統參贊大臣等將各城大臣出具切實考語

密行陳奏如有人地不宜及才不勝任者隨時奏明
更換倘有失察徇隱一經發覺卽將該將軍都統叅
贊大臣等交部分別議處其將軍都統叅贊大臣內
有不正已秉公者亦准各城大臣據實叅奏以資維
制各城章京糧員責成該城大臣認真考察務期人
地相宜新疆駐防人員非實係守潔才優者不准保
奏倘有所保之員或犯贓私卽將原保大臣一併議
處其操守才具平常者亦卽隨時奏咨更換至各城
大臣及司員筆帖式等原設養廉不敷辦公亦卽量
爲議增伊犁將軍現支養廉銀三千兩著加一千兩

伊犁叅贊大臣現支養廉銀一千兩著加銀五百兩
伊犁領隊大臣現支養廉銀七百兩著加銀二百兩
烏魯木齊都統現支養廉銀一千八百八十八兩著
加銀五百兩庫爾喀喇烏蘇領隊大臣現支養廉銀
四百兩著加銀四百兩哈密辦事大臣現支養廉銀
七百兩著加銀二百兩哈密幫辦大臣現支養廉銀
四百兩著加銀二百兩喀什噶爾叅贊大臣現支養
廉銀一千五百兩著加銀五百兩喀什噶爾幫辦大
臣現支養廉銀七百兩著加銀三百兩葉爾羌辦事
大臣現支養廉銀一千一百兩著加銀二百兩葉爾

羌幫辦大臣現支養廉銀七百兩著加銀二百兩烏
什辦事大臣現支養廉銀七百兩著加銀二百兩阿
克蘇辦事大臣現支養廉銀四百兩著加銀六百兩
庫車喀喇沙爾辦事大臣和闐英吉沙爾領隊大臣
現各支養廉銀六百兩著均加銀二百兩其章京筆
帖式等鹽菜銀兩何員應酌加若干應由何項支給
之處著交那彥成詳細核議奏明辦理該大臣等俱
著准其攜眷願否攜帶聽其自便該部知道

道光八年三月十八日會同揚威將軍大學士公

長公齡

奏爲面商南路情形量請更易事竊臣長齡原奏添設防兵八千名內分撥葉爾羌二千名烏什一千名業蒙

允准在案茲與臣

臣

那彥成悉心商榷葉爾羌距卡外各

部落較遠本屬腹地雖回戶衆多內有阿克蘇爲之聲援外有喀什噶爾爲之屏蔽設兵一千名足資防守烏什逼近各布魯特游牧爲極邊要地較之葉爾羌情形倍加緊要應請將葉城防兵二千名分撥一千名添防烏什共設兵二千名惟烏什兵額既增公事倍繁原設辦事大臣一員照料難

周臣等已公同商酌將該城大臣多貴與伊犁領
隊大臣布彥泰請

旨對調另片具奏在案復思布彥泰究竟未經軍旅查
有西安協領德惠辦事體面才具精細前隨臣那
彥成在滑縣軍營打仗奮勇上年臣長齡奏調大
營帶兵出力奏蒙

聖恩賞給勇號此次臣那彥成奏帶出關沿途委辦事
件頗能實心實力如以德惠作爲烏什幫辦大臣
可期得力第添設幫辦一員歲需廉俸有關經費
不能不通盤核計查和闐僻在一隅回情淳樸迥

非喀葉等城可比該城舊設防兵只有二百餘名
原設辦事大臣一員幫辦一員轉覺人浮於事臣
等體察情形

欽派辦事大臣多隆武一員足資經理其幫辦一缺堪
以改歸烏什於經費並無增添地方繁簡適得其
宜現任和闐幫辦大臣富盛阿人雖老實惟精力
漸衰以之調補庫爾喀喇烏蘇領隊似可勝任臣
等爲地方情形因時制宜起見反覆面商意見相
同謹合詞恭摺具奏謹

奏

道光八年四月十二日奉

上諭布彥泰著賞給副都統職銜作爲烏什總辦大臣
所遺伊犁領隊大臣員缺著多貴調補西安協領德
惠著賞給頭等侍衛作爲烏什幫辦大臣天津鹽運
司札隆阿著賞給頭等侍衛作爲葉爾羌總辦大臣
恒敬著回京當差常格著調補庫車辦事大臣所遺
庫爾喀喇烏蘇領隊大臣著福綿調補各赴新任

道光八年五月初六日

奏正拜摺問適准陝甘總督楊遇春咨奉

上諭寧夏鎮總兵員缺著副將郭繼昌補授欽此查郭

繼昌原係派來南路換防副將茲_臣等原議喀什噶爾移駐總兵一員已於正摺內奏明在案茲該鎮旣已奉

旨補授寧夏鎮總兵所有喀什噶爾換防總兵自應另自請人補放惟回子情形最敬滿洲似滿洲大員較爲得力查

乾清門侍衛舒倫保曾任伊犁領隊署理綏定鎮總兵營伍曉暢心地純厚如蒙

俯准以舒倫保作爲喀什噶爾換防總兵或由內簡派或仍留郭繼昌換防之處出自

聖裁 臣等不敢擅便謹合詞附片謹

奏

道光八年六月初七日奉

上諭那彥成等奏請簡派換防總兵等語喀什噶爾准其添設換防總兵卽著舒倫保補放

道光八年六月初二日會同叅贊大臣固原提督楊公芳喀什噶爾叅贊大臣武公隆阿

奏爲遵

旨覆奏事竊 臣等於五月初七日承准軍機大臣字寄

道光八年四月初十日奉

上諭和闐幫辦大臣裁汰一節此時和闐甫經戡定雖
僻在一隅防範亦關緊要未便遽行裁撤著暫仍其
舊俟一二年後再行體察情形辦理現任和闐幫辦
大臣富盛阿據稱精力漸衰是否尚能勝任著那彥
成等詳加察看如難期稱職卽據實奏請撤回另行
就近酌保一員請旨補授至葉爾羌辦事大臣已降
旨賞給札隆阿頭等侍衛更換恒敬著那彥成隨時
詳察札隆阿如能辦理裕如卽隨時據實具奏欽此
伏思和闐僻在一隅雖係腹地而人心甫定鎮撫

需人荷蒙

聖明指示俟一二年後再行裁撤幫辦大臣仰見

神謨廣運燭照靡遺

臣

等不勝欽佩查和闐幫辦大臣

富盛阿年逾六旬精力漸衰是以長齡會同

臣

那

彥成奏請

簡調茲

臣

那彥成行抵西四城採訪各大臣官聲該員

才具未能開展辦理和城善後事宜不洽輿情未

便因其並無劣跡稍事姑容應請

旨將富盛阿原品休致該員歷次出師著有勞績應由

部

臣

照例核辦其和闐幫辦一缺查有三等侍衛

貴成自上年蒙

恩降職之後深知愧悚此次奉

命隨

臣

那彥成赴喀差遣沿途留心察看頗知檢束心

地尚屬明白清漢文義亦尚蠡通以之補授和闐幫辦大臣可期勝任且聞該員去歲隨同打仗甚爲出力弓馬實在結實嫻熟相應據實保奏可否賞給頭等侍衛作爲和闐幫辦大臣恭候

欽定至札隆阿

臣

那彥成奏請隨帶前來途次與長齡

密商長齡亦深知其人才具可用是以會銜具奏
現經恭錄

諭旨咨令前赴葉城接印任事俟查辦各項善後事宜

完竣如該員果能辦理裕如再當遵

旨隨時據實具奏謹

奏

謹按道光八年七月初三日廷寄內奉

上諭那彥成另摺奏和闐幫辦大臣富盛阿年力漸衰
辦事不洽輿情富盛阿著以原品休致該員曾經出
師著績著兵部照例核辦

道光八年七月初三日奉

上諭富盛阿所出和闐協辦大臣員缺著孝順岱調補
其所遺員缺著賞給貴成頭等侍衛作爲伊犁領隊

大臣各馳驛前赴新任

道光八年六月初二日會同叅贊大臣固原提督
楊公芳喀什噶爾叅贊大臣武公隆阿幫辦大臣
蘇公清阿

奏爲遵

旨覆奏事竊臣等於五月初七日承准軍機大臣字寄
道光八年四月初十日奉

上諭署喀什噶爾阿奇木伯克伊薩克自軍興以來諸
事奮勉實心出力忠勤可嘉前經降旨加恩晉封爲
郡王朕思乾隆年間出力回臣如額敏和卓玉素布

俱曾用爲回城辦事大臣伊斯堪達爾曾任喀什噶爾幫辦大臣現在伊薩克於喀什噶爾情形自爲熟悉其能否堪勝該處幫辦大臣之任著那彥成等留心察看據實覆奏欽此伏查伊薩克自軍興以來首先帶領回兵告往出力節次隨同打仗偵探賊情採辦軍糧牛羊駝馬帶路出卡生擒張逆遇事奮勉頗著忠誠實屬有用之才臣等曾經議及卽以該伯克用爲幫辦大臣亦堪勝任因回疆甫經戡定該伯克究係夷人是不敢陳奏乃蒙

皇上聖明溯查乾隆年間回子郡王額敏和卓玉素布

伊斯堪達爾之例令臣等留心察看仰徵

聖主萬幾之暇用人無方之至意使臣等未盡愚忱得

所遵循不勝感激歛服之至茲查伊斯堪達爾前

任喀什噶爾幫辦舊制公堂理事叅贊大臣正坐

幫辦大臣次坐該回子幫辦旁坐遇有應稟阿奇

本本任事件仍循回子向來規矩呈堂面稟一切

營制軍民交涉事件概不准干預凡遇回務與邊

外各事件准其會銜奏事名列幫辦大臣之次嗣

蒙

高宗純皇帝特恩將伊斯堪達爾之名列於正辦叅贊大

臣之次查伊薩克才具資格尚遜於伊斯堪達爾而辦事勇往頗有忠心且自委署阿奇木伯克以來撫綏回衆措置得宜如蒙

俞允伊薩克卽請

簡放喀什噶爾阿奇木伯克格外

施恩作爲幫辦大臣實堪勝任謹據實繕摺覆

奏再臣等更有請者前年軍興伊始土爾扈特汗車

登多爾濟伊弟台吉陽沁多爾濟湯濟等古官兵

一千名打仗甚爲出力經長齡將帶兵貝子巴爾

達拉什等奏請

恩施並聲明車登多爾濟時值告假娶親未回調遣兵馬係副盟長策伯克札布辦理奏請

賞戴花翎在案臣等竊思調撥蒙古兵丁雖係該副盟長代辦而車登多爾濟世爲臣僕首知恭順

天朝平日講求大義率屬有方是以所屬敵愾同仇人効命今所屬旗下均已受

恩而該汗轉未得蒙鼓勵於該旗下相形似有未周合無仰懇

皇上天恩俯准車登多爾濟

賞戴雙眼花翎其胞弟台吉楞沁多爾濟

賞戴花翎以示獎勵之處出自逾格

鴻慈謹

奏

道光八年七月初三日奉

上諭那彥成等覆奏察看伊薩克堪勝幫辦一摺前因伊薩克實心出力忠勤可嘉諭令那彥成等看其能否堪勝幫辦大臣之任據實覆奏茲據奏伊薩克遇事奮勉頗著忠誠其才實屬可用伊薩克著卽以喀什噶爾阿奇木伯克加恩作爲該處幫辦大臣仍照伊斯堪達爾幫辦之例一切營制軍民交涉事件不

准干預凡遇回務與邊外各事宜准其會銜具奏名
列幫辦大臣之次以示優獎至土爾扈特汗前因西
四城軍興協濟蒙古兵丁打仗出力恭順可嘉近已
有旨加恩將車登多爾濟並其弟台吉楞沁多爾濟
均賞戴花翎矣

道光八年七月十九日會同叅贊大臣固原提督
楊公芳喀什噶爾叅贊大臣武公隆阿

奏爲遵

旨覆奏事竊臣等於道光八年七月十一日接准軍機

大臣字寄六月十一日奉

上諭那彥成現抵喀什噶爾一切善後事宜自己商有
就緒此時楊芳在彼如無應辦之事卽著來京陛見
後回任供職再喀什噶爾幫辦大臣蘇清阿朕意令
其來京所有幫辦大臣一缺著那彥成武隆阿於現
留回疆各員內詳加察看有才堪勝任者卽秉公據
實保奏候旨簡放以便更替蘇清阿來京並發去御
書匾額交該督於新建納木札爾義祠懸掛欽此欽
遵在案現在回疆各事宜如嚴禁茶黃出卡驅逐
安集延徵收糧石酌減換防官兵查核各城應修
城堡及各城被難伯克諸大端臣等悉心籌畫節

次奏明在案臣楊芳原擬六月內起程進京

陛見奈於六月中旬以積年濕熱薰蒸右腋得患膿癰
雖無關於全體飲食如常而廿餘日來尚未潰破
出膿不時作痛痛久傷氣少覺軟弱現在趕緊調
治俟出膿後畧得復元卽趕緊起程入關至喀什
噶爾幫辦大臣蘇清阿現奉

旨令其回京復奉

旨著臣等察看現在回疆各員內才堪勝任者據實保
奏作爲幫辦大臣以便更替蘇清阿回京欽此查喀什
噶爾幫辦一缺無事與叅贊一同辦公有事則

參贊督辦後路幫辦爲前敵緊要之人現在甫經
戡定幫辦之任須得曾經行陣得力之人查現在
各城大臣內如葉爾羌辦事大臣札隆阿阿克蘇
辦事大臣長清烏什辦事大臣布彥泰爲回疆出
色之員而葉爾羌人戶繁多逼近外夷本城應辦
各事較多札隆阿才可治繁理劇識見開展精到
非該員不能料理裕如阿克蘇上年爲大軍後路
緊要之區軍需各事並現在修築城堡查辦地畝
等事亦須長清一手經理較爲妥協烏什逼近布
魯特上年曾有庫圖魯克滋事之案現在撫綏尤

須認真布彥泰亦難更易至葉爾羌幫辦大臣札克桑阿才具平平和闕辦事大臣多隆武謹飭有餘才具不能開展庫車辦事大臣常格到任未久且亦非出色之員喀喇沙爾領隊大臣巴哈布人尚勇往然臣那彥成到後公文往返商酌善後各事心地不明諸多竭蹶臣等亦擬請更換查各城如札隆阿等三員未便更調札克桑阿等五員臣等秉公酌商復不敢濫行保列惟查有去歲凱撤回京之健銳營叅領現陞副都統塔斯哈臣那彥成亦知其人尚體面漢仗好帶兵亦屬嚴肅據臣

武隆阿云該員人甚明白麤通清漢文義去歲進
勦時帶領京營馬隊亦屬奮勇又伊犁錫伯總管
副都統銜額爾古倫打仗勇往人亦體面滿文亦
好絕無口外駐防惡習斷不致於苟且傳授營私
秘本等事該二員中可否請

旨酌用一員出自

聖恩臣等更有請者和闐地方蕃庶管轄六城年例有
回戶納交錢糧布疋等事較別城爲繁該城大臣
多隆武謹飭小心惟才具太不開展現在剔除積
弊撫字回夷該員實不能料理從容英吉沙爾領

隊大臣那桑阿鎗馬嫻熟打仗奮勇並非無用之人奈清漢文義俱不通曉每遇公事俱係印房章京等向伊講解該員以自已不識字不懂公事深知畏懼時向臣等懇求代奏調一幫辦簡缺俾免愆尤英城要緊公事雖有叅贊經理究係專城恐致貽悞等語查該員情詞出於至誠尚非規避新疆臣等謹擬烏什一城布彥泰熟悉情形而未經行陣如以那桑阿調爲該城幫辦足備緩急那桑阿所出英吉沙爾一缺現任和闐領隊辦事大臣多隆武堪以調補臣武隆阿可以就近照料於

公事可期無悞其所遺之缺查烏什幫辦大臣德
惠人尚明白曉事堪以調補如此轉移各城辦事
帶兵兩有裨益可否更調之處出自

聖裁再向來喀什噶爾叅贊大臣總統回疆八城近復
奉

旨假以專制責任綦重至幫辦大臣惟辦本城事件道
光元年經慶祥奏明八城事件幫辦大臣協同經
理於舊制實屬更張現在叅贊節制各城係屬舊
制各城大臣無不凜遵至幫辦大臣之任與各城
大臣相等亦隨同專制既於體制未協各城大臣

亦未能帖服嗣後應請

旨喀什噶爾幫辦大臣祇辦理本城事件不准干預別
城公事以復舊制至各城辦事大臣照例摺奏紛
紛具奏徒勞驛站此後各城如賀摺及謝年節

賞奏報到任均係照例之事俱呈交將軍都統叅贊遇
便彙奏如有條奏或緊要或叅劾仍准專摺陳奏
亦不准藉詞推諉謹

奏

道光八年八月二十日奉

上諭那彥成等奏請更調各城辦事幫辦大臣一摺蘇

清阿著來京供職喀什噶爾幫辦大臣員缺著額爾古倫補授那桑阿著調補烏什幫辦大臣多隆武著調補英吉沙爾領隊大臣所遺和闐領隊大臣員缺著德惠調補至喀什噶爾幫辦大臣向祇辦理本城事件嗣經慶祥奏明將八城事件協同叅贊經理茲據那彥成等奏稱該幫辦大臣與各城大臣相等若亦隨同叅贊節制各城與體制未協著照所請嗣後喀什噶爾幫辦大臣祇辦本城事件不得干預別城公事以復舊制所有各城辦事大臣照例摺奏若該處一時事務無多未便徒勞驛站著照本年五月間

所降諭旨附於隣近各城大臣奏事之便一同發遞
如有緊要事件或條奏叅劾等事仍准專摺陳奏不
得藉詞推諉

道光八年七月十九日會同叅贊大臣固原提督
楊公芳喀什噶爾叅贊大臣武公隆阿

奏喀什噶爾暫留換防兵丁前經長齡派委安西協
副將今性壽春鎮總兵郭繼昌統轄操防嗣_臣等
奏請添設換防總兵一缺欽奉

諭旨著舒倫保補放欽此當卽欽遵照會並據郭繼昌
呈報交卸前來_臣等查喀什噶爾換防總兵一缺

由涼州鎮裁改係屬新設應請

旨勅下部

臣

鑄給喀什噶爾換防總兵官印信一顆以

昭信守至郭繼昌交代完竣循例呈請入都恭謝
天恩已令其起程入關謹

奏

道光八年八月二十日奉

上諭那彥成等奏請頒發印信等語喀什噶爾新設換
防總兵印信著禮部鑄造該部知道

道光八年八月二十二日會同叅贊大臣固原提

督楊公芳喀什噶爾叅贊大臣武公隆阿

奏臣楊芳前因右腋患痛不能卽時起程業經奏蒙
聖鑒茲已潰膿雖未收口已能照常飲食於八月十六
日起程緩行調養俟瘡口平復卽趨程馳赴

闕廷跪聆

聖訓臣那彥成自抵回疆應辦事宜均已次第入奏惟
逆酋家屬一事欽遵

諭旨不必嚴索窮搜此時斷絕貿易各外夷無不歸咎
於浩罕於彼已頓失把握不久自必款關効順臣
已密派妥人前往查探若辨有頭緒卽當具奏臣
渥荷

殊恩膺茲重任斷不敢草率從事亦不敢有意耽延約計秋杪冬初諸務完善卽當俶裝入關俾得早日恭復

恩命謹

奏奉

硃批知道了

道光八年十月初五日

奏臣欽奉

上諭蘇清阿著來京供職所遺喀什噶爾幫辦大臣員缺著額爾古倫補授欽此當卽欽遵咨照去後茲蘇

清阿查閱卡倫事畢別無經手未清事件卽於九
月二十五日起程赴京供職請據情代奏前來謹
奏奉

硃批知道了

各城章京請復用京員舊制

道光八年八月二十二日會同叅贊大臣固原提督楊公芳喀什噶爾叅贊大臣武公隆阿

奏爲回疆各城印房章京請復由京揀派舊制酌留
三缺在外奏補事伏查回疆南路八城額設印房
等處章京共十七缺除英吉沙爾事務較簡向無
章京外其餘七城定例內糧餉章京六員專用由
京揀派廢員喀什噶爾額設印房回務經牧章京
三缺葉爾羌界通外夷額設印房章京二缺喀喇
沙爾蒙回襟處設有印房回夷章京二缺庫車阿

克蘇烏什和闐各城僅有印房章京一缺查定例均係由京揀派司員前來辦理嗣因京員情形不熟間有不通清漢文義者辦公不能得力是以各城大臣在駐防筆帖式內擇其熟諳之員給予主事職銜奏准補用迨後屬員鑽營上司瞻徇相沿成習竟至盡用駐防之員而該筆帖式等皆由烏魯木齊古城巴里坤換防馬甲內挑補在各城當差用至章京已歷十餘年之久雖爲熟習情形而日久把持固結成風舞弊營私擾累回子無所不至亟應請復舊制仍用京員惟思伊犁烏魯木齊

駐防亦係滿洲世僕未始無才可用由馬甲挑補
各城筆帖式用爲章京一途是其上進之階若一
律改用京員其才堪造就者亦覺可惜茲臣等悉
心酌議以上七城印房章京七缺全用京員作爲
掌印章京喀什噶爾回務章京一缺亦請由京揀
派餘經牧一缺公事無多改歸印房掌印章京兼
管其缺改爲印房幫辦應請留外奏補駐防人員
葉爾羌原設印房章京二缺一缺已擬由京揀派
作爲掌印章京以一缺作爲幫辦應留外奏補駐
防人員其喀喇沙爾夷回章京一缺必須通曉蒙

古文義之員方能勝任應請留外奏補駐防人員
以上酌留三缺駐防人員亦不至無進用之路遇
有缺出南八城各保駐防筆帖式一員務須精通
滿漢文理體面有品之人方准列保由叅贊大臣
核定奏補再查各部院主事內素能辦事之員各
衙門自不肯派出兵差且三年差滿回京不計勞
績稍有才具之人亦不樂於自見均係二三等之
員於公事仍屬無益臣等查察哈爾八旗游牧主事
定例於蒙古寶缺筆帖式內考取熟諳清漢文義
之員作爲游牧主事當差八年後卽准選用員外

今擬回疆各城章京缺出亦請援照游牧主事之
例奏請

飭下各部院衙門保送通曉清漢文義滿洲實缺筆帖
式一員彙考錄取帶領引

見恭候

欽定候奉

旨補放即將該筆帖式作爲委署主事赴各城換班三
年期滿如果得力出色奏明咨部以主事卽選得
缺後卽由部奏請咨取帶領引

見更換俟由京揀派之員到日再行請咨回京供職如

此酌量變通則由京揀派之人均非備員且一經補放卽得陞銜人知自愛可期治理將來回疆熟悉情形又可得人惟經此次奏定之後全在叅贊及各城辦事大臣各秉公正實力奉行倘沿積習一時遷就驅使甚至私市已恩便於通同作弊濫行保舉仍無裨益應卽奏定遇有掌印章京缺出永不准通挪奏補駐防人員倘敢故違經部指駁照狗庇例議處至現在各城印房章京或早已循例奏補或甫經遴員陞調似未便一時更撤應俟各該員年滿咨明叅贊大臣奏請由京揀派嗣後

各城章京出缺卽照新定章程辦理謹

奏

道光八年九月二十二日奉

上諭那彥成等奏回疆各城印房章京請復由京揀派
舊制並請酌留在外奏補一摺回疆各城額設印房
等處章京向俱由京揀派嗣因京員情形不熟不能
得力每於駐防筆帖式內遴才奏補日久相沿難盡
覈實且該員等把持固結流弊日滋據該督等請復
舊制並酌留三缺俾駐防筆帖式中才堪造就者亦
不致阻其上進之堦著照所請除英吉沙爾向無章

京外其餘七城印房章京七缺悉用京員作爲掌印
章京喀什噶爾回務章京一缺亦著由京揀派其經
牧一缺公事無多改歸印房掌印章京兼管其缺改
爲印房幫辦准其留補駐防人員葉爾羌原設印房
章京二缺內一缺已用京員作爲掌印章京其一缺
准其改爲幫辦留補駐防人員喀什噶爾回章京
一缺亦准其留補駐防人員以上所留三缺遇有缺
出該城大臣務擇其才品兼優者保送該叅贊大臣
覈定奏補不得仍前徇隱濫竽其由京揀派章京缺
出亦著照所請將通曉清漢文義之滿洲筆帖式由

各部院衙門保送一員彙考錄取帶領引見補放作
爲委署主事前往換班三年期滿如果得力出色奏
明咨部以主事卽選得缺後卽由部奏請咨取帶領
引見更換俟由京揀派之員到日再行給咨回京嗣
後遇有掌印章京缺出永不准通挪奏補駐防人員
違者照狗庇例議處現在各城印房章京或早經奏
補或甫經陞調未便一時更撤著俟各該員年滿再
行奏請照新定章程辦理該部知道

整飭卡衛

道光八年四月十九日

奏查烏什原設巴什雅哈瑪沙土畢底爾貢固魯克
畢得克里克雅瑪素卡倫六處向派侍衛四員各
帶兵數名分駐四處巡防前經長齡奏裁喀什噶
爾葉爾羌等城卡倫侍衛改用綠營惟烏什尚未
改臣已於前摺內奏明在案茲查該六處卡倫除
畢底爾雅瑪素係屬小卡該二處向亦未設卡倫
侍衛外巴什雅哈瑪畢得克里克等四處卡倫統
計二百餘里接壤外夷若零星散布則兵分見單

實不足恃擬將四處卡倫分設三堡中堡駐兵八十名左右兩堡各駐兵五十名三堡之間設卡房二處各駐兵十名會走開齊務令日日無間聲勢聯絡可期得力庶布魯特無從偷越藉可嚴查出入之安集延私販茶黃臣與布彥泰多貴斟酌形勢似應照辦現於留防綠營備弁內遴委守備千把共三員帶兵前往接替暫支賬房居住以便侍衛札勒杭阿等交卸起程回京謹

奏

謹按道光八年五月十五日廷寄內奉

上諭那彥成奏烏什原設巴什雅哈瑪沙土畢底爾貢
固魯克畢得克里克雅瑪素卡倫六處前據長齡等
奏裁各城卡倫侍衛改用綠營惟烏什尚未裁改茲
據該督查明除畢底爾雅瑪素二處向未設有卡倫
侍衛其巴什雅哈瑪等四處卡倫統計二百餘里接
壤外夷若零星散布兵分見單著照所請將四處卡
倫分設三堡中堡駐兵八十名左右兩堡各駐兵五
十名三堡之間設卡房二處各駐兵十名會走開齊
聲勢聯絡務令巡防周密以期得力並於留防綠營
備弁內遴委守備千把共三員帶兵前往接替

道光八年十月初五日會同喀什噶爾叅贊大臣
武公隆阿幫辦大臣蘇公清阿

奏爲建設堡卡酌定分巡駐守章程事竊照上年揚
威將軍長齡奏裁西四城卡倫侍衛請改派綠營
官兵駐卡欽奉

上諭著照所議將額設侍衛悉行裁汰卽於留防官兵
內選派得力員弁分駐防守並於大小卡倫酌加兵
額以期周密應加兵若干及如何分布巡防稽查獎
賞之處亦著那彥成於到彼後妥爲籌議奏明辦理
欽此茲查長齡原奏內喀什噶爾葉爾羌英吉沙

爾各卡倫撤去滿兵改派綠營弁兵駐守惟喀什
噶爾等三城通共卡倫二十處中間俱有開齊小
路各卡相距數十里至百十里不等向來每卡僅
派兵十名原因各城駐兵無多不能多設上年張
逆滋事之時不過數百人無如官兵只有十餘人
一經圍困聲息遂斷以致張逆已至城下我兵尚
未知覺該逆乘空招集逆黨故人數益多殊非慎
重邊防之道且現奉

諭旨斷絕外夷貿易嚴禁茶黃出卡正當

功令森嚴之時僅照從前舊制每卡駐兵十名不但

有事時兵力單弱卽現在稽查一切亦不足以昭
嚴密而壯聲威茲喀什噶爾存城兵四千三百餘
名葉爾羌存城兵一千二百餘名兵數儘足敷用
應於各卡倫適中要隘之地築堡駐兵存城兵力
既不單弱而外夷知各要隘俱設重兵藉可周查
出入實屬一舉兩得臣等悉心酌擬喀什噶爾所
屬卡倫八處以喀郎圭圖舒克塔什烏帕拉特三
處卡倫爲通浩罕等外夷總要之路該三卡適中
之明約洛地方實爲扼塞應於該處築土堡一處
遴派得力都守一員管帶綠營兵二百名駐守貿

硃

硃

硃

硃

易亨卽建設堡內其巴爾昌伊蘭瓦斯伊斯里克
三卡適中之阿爾瑚莊西及玉都巴什伊勒古楚
兩卡適中之馬廠地方均築土堡一處每處遴派
得力千把總一員各管帶綠營兵六十名駐守以
上三堡俱酌量兵數添建兵房其餘各卡各派千
把外委一員帶兵十名專司稽查出入探信瞭望
及押送來往夷人與各堡策應遇有探報事件就
近報明駐堡員弁派兵接報大城再於各卡添派
滿營驍騎校等官一員各帶兵七名專司查對開
齊信牌逐日踏看有無偷越踪跡該駐堡都守千

殊

殊

把逐口分派兵丁稽查所屬卡倫及小卡開齊路
徑間日帶兵親查會哨至葉爾羌所屬卡倫七處
亮噶爾卡倫通巴達克山等外夷庫庫雅爾卡倫
通克什米爾等外夷均屬要隘應於該二處各築
土堡添建兵房每處安設得力千總一員各管帶
綠營兵六十名駐守其餘和什喇普玉拉里克奇
靈桑珠賽里克等五處卡倫均非外夷必由之路
各派把總外委等官一員帶兵十五名駐守其查
對開齊等事與喀什噶爾一體辦理英吉沙爾所
屬卡倫五處惟烏魯克卡倫爲通各外夷及布魯

硃

特要路應於該卡建築土堡兵房遴派得力千把
總一員管帶綠營兵六十名駐守其餘圖木舒克
特爾格齊克特比斯鐵列克四卡各安兵十名責

硃

成駐堡千把總周歷巡查足資控制和闡僻處一

硃

隅所屬卡倫十二處並不與外夷相通向止每卡

硃

派兵二名應仍其舊毋庸築堡添兵以上各官兵
均按月更換各城大臣不時派委大員帶領兵丁
抽查開齊如躡有私越形跡該管官兵未能盤獲
及匿不稟報者予以嚴懲以警怠忽至各守卡官
兵如有偷避潛回及私放茶黃出卡或訛索外夷

入卡貿易並稟報遲延不實等事一經發覺邊防
要務不可少從寬縱應按依軍法辦理如此分布
巡查明定章程各卡倫將備弁兵自能益加慎重
名城所需建築土堡兵房工費歸於城工案內彙
奏至烏什各卡倫前經具奏業已奉

旨遵辦在案合併聲明謹

奏

道光八年十一月初七日奉

上諭那彥成等奏建設堡卡酌定分巡駐守章程一摺
前據長齡奏請裁撤喀什噶爾等城卡倫侍衛改派

綠營官兵駐卡防守當經降旨准行並令那彥成查明大小卡倫應加兵額若干及如何分布巡防稽查獎賞之處妥爲籌議茲據奏喀什噶爾葉爾羌英吉沙爾三城通共卡倫二十處中間俱有開齊小路各卡相距數十里至百數十里不等向來每卡駐兵十名稽查未能嚴密請於各卡倫要隘適中之地添建土堡及官兵額數分巡駐守著照所請喀什噶爾所屬卡倫八處內喀郎圭圖舒克塔什烏帕拉特三卡爲通浩罕等外夷要路該三卡適中之明約洛地方著築土堡一處遴派得力都司守備一員管帶綠營

兵二百名駐守其貿易亭卽建設堡內並於巴爾昌
伊蘭瓦斯伊斯里克三卡適中阿爾瑚莊西及玉都
巴什伊勒古楚兩卡適中之馬廠地方均築土堡一
處每處遴派得力千把總一員各管帶綠營兵六十
名駐守以上三堡俱著酌量兵數添建兵房其餘各
卡各派千把外委一員帶兵十名專司稽查出入探
信瞭望及押送來往夷人與各堡策應遇有探報事
件就近報明駐堡員弁派兵接報該城再於各卡添
設滿營驍騎校等官一員各帶兵七名專司查對開
齊信牌逐日踏看有無偷越踪跡該駐堡之都司守

備千總把總逐日派兵稽查所屬卡倫及小卡開齊
路徑間日帶兵親查會哨至葉爾羌所屬卡倫七處
內亮噶爾卡倫通巴達克山等外夷庫庫雅爾卡倫
通克什米爾等外夷均係要隘著於該二處各築土
堡添建兵房每處安設得力千總一員各帶綠營兵
六十名駐守其餘和什喇普玉拉里克奇靈柔珠賽
里克等五處卡倫均非外夷必由之路著各派把總
外委等官一員帶兵十五名駐守其查對開齊等事
與喀什噶爾一體辦理英吉沙爾所屬卡倫五處惟
烏魯克爲通各外夷及布魯特要路著於該卡建築

土堡兵房遴派得力千把總一員管帶綠營兵六十名駐守其餘圖木舒克特爾格齊克特比斯鐵列克四卡各派兵十名責成駐堡千把總周歷巡查足資控制至和闐所屬卡倫十二處並不與外夷相通每卡兵數著仍其舊以上各官兵均著按月更換並著各該城大臣隨時派委大員帶領兵丁抽查開齊如查有私越形跡該管官未能查獲及匿不稟報者卽行嚴叅懲處其各守卡官兵如有偷避潛回及私放大黃茶葉出卡或訛索外夷入卡貿易並稟報遲延不實情事一經發覺卽按依軍法辦理各城所需建

築土堡兵房工費著歸於城工案內彙奏該部知道

那文毅公籌畫回疆善後事宜奏議卷七十四